



中国经典名著

全唐诗

(二十六)

黄怀仁 齐思明 校正

学苑音像出版社

目 录

第四百八十四卷.....	1
第四百八十五卷.....	6
第四百八十六卷.....	29
第四百八十七卷.....	56
第四百八十八卷.....	71
第四百八十九卷.....	76
第四百九十卷.....	80
第四百九十一卷.....	87
第四百九十二卷.....	99
第四百九十三卷.....	123
第四百九十四卷.....	132
第四百九十五卷.....	182
第四百九十六卷.....	188
第四百九十七卷.....	217
第四百九十八卷.....	248
第四百九十九卷.....	271
第五百卷.....	286
第五百零一卷.....	300

第四百八十四卷

和太原张相公山亭怀古

崔公信

叠石状崖巘，翠含城上楼。前移庐霍峰，远带沅湘流。
潇洒主人静，夤缘芳径幽。清辉在昏旦，岂异东山游。

过小妓英英墓

杨虞卿

萧晨骑马出皇都，闻说埋冤在路隅。别我已为泉下土，
思君犹似掌中珠。四弦品柱声初绝，三尺孤坟草已枯。
兰质蕙心何所在，焉知过者是狂夫。

句

杨虞卿

河势昆仑远，山形菡萏秋。（《过华作》）



和段相公登武担寺西台

杨汝士

清净此道宫，层台复倚空。偶时三伏外，列席九霄中。
平视云端路，高临树杪风。自怜荣末座，前日别池笼。

和段相公夏登张仪楼

杨汝士

从公城上来，秋近绝纤埃。楼古秦规在，江分蜀望开。
远山标宿雪，末席本寒灰。陪赏今为忝，临欢敢诉杯。

和宗人尚书嗣复祠祭武侯毕，题临淮公旧碑

杨汝士

古柏森然地，修严蜀相祠。一过荣异代，三顾盛当时。
功德流何远，馨香荐未衰。敬名探国志，饰像慰毗思。
昔谒从征盖，今闻拥信旗。固宜光宠下，有泪刻前碑。

宴杨仆射新昌里第

杨汝士

隔坐应须赐御屏，尽将仙翰入高冥。文章旧价留鸾掖，



桃李新阴在鲤庭。再岁生徒陈贺宴，一时良史尽传馨。
当时疏广虽云盛，讵有兹筵醉绿醪。

建节后偶作

杨汝士

抛却弓刀上砌台，上方台榭与云开。
山僧见我衣裳窄，知道新从战地来。

题画山水

杨汝士

太华峰前是故乡，路人遥指读书堂。
如今老大骑官马，羞向关西道姓杨。

贺筵占赠营妓

杨汝士

郎君得意及青春，蜀国将军又不贫。
一曲高歌红一匹，两头娘子谢夫人。



句

杨汝士

昔日兰亭无艳质，此时金谷有高人。（裴令公居守东洛，夜宴半酣，公索句，元白有得色，时公为破题，次至汝士云云。白知不能加，遽裂之，曰：“笙歌鼎沸，勿作冷淡生活。”元顾白曰：“乐天所谓能全其名者也。”）

赋得芙蓉出水

陈至

菡萏迎秋吐，天摇映水滨。剑芒开宝匣，峰影写蒲津。
下覆参差荇，高辞苒弱蘋。自当巢翠甲，非止戏赭鳞。
莫以时先后，而言色故新。芳香正堪玩，谁报涉江人。

荐冰

陈至

凌寒开涸沍，寝庙致精诚。色静澄三酒，光寒肃两楹。
彤盐非近进，玉豆为潜英。礼自春分展，坚从北陆成。
藉茅心共结，出鉴水渐明。幸得来观荐，灵台一小生。



句

陈至

藻井尚寒龙迹在，红楼初施日光通。（《红楼院》）

荐冰

赵蕃

仲月开凌室，斋心感圣情。寒姿分玉坐，皓彩发丹楹。
积素因风壮，虚空向日明。遥涵窗户冷，近映冕旒清。
在掌光逾澈，当轩质自轻。良辰方可致，由此表精诚。

老人星

赵蕃

大史占南极，秋分见寿星。增辉延宝历，发曜起祥经。
灼烁依狼地，昭彰近帝庭。高悬方杳杳，孤白乍荧荧。
应见光新吐，休征德自形。既能符圣祚，从此表遐龄。



第四百八十五卷

古意

鲍溶

女萝寄青松，绿蔓花绵绵。三五定君婚，结发早移天。
肃肃羔雁礼，泠泠琴瑟篇。恭承采蘋祀，敢效同车贤。
皎日不留景，良辰如逝川。愁心忽移爱，花貌无归妍。
翠袖皓珠粉，碧阶封绿钱。新人易如玉，废瑟难为弦。
寄谢薜华木，荣君香阁前。岂无摇落苦，贵与根蒂连。
希君旧光景，照妾薄暮年。

萧史图歌

鲍溶

霜绡数幅八月天，彩龙引凤堂堂然。小载萧仙穆公女，
随仙上归玉京去。仙路迢遥烟几重，女衣清净云三素。
胡髯毵珊云髻光，翠蕤皎洁琼华凉。露痕烟迹渍红貌，
疑别秦宫初断肠。此天每在西北上，紫霄洞客晓烟望。



会仙歌

鲍溶

轻轻濛濛，龙言凤语何从容，耳有响兮目无踪。
杳杳默默，花张锦织，王母初自昆仑来，
茅盈王方平在侧。青毛仙鸟衔锦符，
谨上阿环起居王母书。始知仙事亦多故，
一隔绛河千岁馀。详玉字，多喜气，瑶台明月来堕地。
冠剑低昂蹈舞频，礼容尽若君臣事。愿言小仙艺，
姓名许飞琼，洞阴玉磬敲天声。乐王母，
一送玉杯长命酒。碧花醉，灵扬扬，笑赐二子长生方。
二子未及伸拜谢，苍苍上兮皇皇下。

李夫人歌

鲍溶

璿闺羽帐华烛陈，方士夜降夫人神。葳蕤半露芙蓉色，
窈窕将期环珮身。丽如三五月，可望难亲近。
嚬黛含犀竟不言，春思秋怨谁能问。欲求巧笑如生时，
歌坐在空瑟衔丝。神来未及梦相见，帝比初亡心更悲。



爱之欲其生又死，东流万代无回水。宫漏丁丁夜向晨，
烟消雾散愁方士。

水殿采菱歌

鲍溶

宫鸦叫赤光，潮声入宫宫影凉。火华啼露卷横塘，
金堤四合宛柔扬。美人荷裙芙蓉妆，柔黄萦雾棹龙航。
采莲一声歌态长，青丝结眼捕鸳鸯。

周先生画洞庭歌

鲍溶

江南客，水为乡，舟为宅，能以笔锋知地脉。
闲分楚水入丹青，不下此堂临洞庭。水文不浪烟不动，
木末棱棱山碧重。帝子应哀窈窕云，客人似得婵娟梦。
六月火光衣上生，斋心寂听潺湲声。林冰摇镜水拂簟，
尽日独卧秋风清。因游洞庭不出户，疑君如有长生路。
玉壶先生在何处？



霓裳羽衣歌

鲍溶

玉烟生窗午轻凝，晨华左耀鲜相凌。
人言天孙机上亲手迹，
有时怨别无所惜。遂令武帝厌云韶，金针天丝缀飘飘。
五声写出心中见，拊石喧金柏梁殿。此衣春日赐何人，
秦女腰肢轻若燕。香风间旋众彩随，联联珍珠贯长丝。
眼前意是三清客，星宿离离绕身白。鸾凤有声不见身，
出宫入徵随伶人。神仙如月只可望，瑶华池头几惆怅。
乔山一闭曲未终，鼎湖秋惊白头浪。

寓兴

鲍溶

念来若望神，追往如话梦。梦神不无迹，谁使烦心用。
鲁圣虚泣麟，楚狂浪歌凤。那言阮家子，更作穷途恸。

游山

鲍溶

白道行深云，云高路弥细。时时天上客，遗路人间世。



烟花最深处，井臼得空刺。天寒鹤巢林，石长泉脉闭。
神化万灵集，心期一朝契。不见金板书，谁知阮家裔。
终期太古人，问取松柏岁。

隋宫

鲍溶

御街多行客，行客悲春风。楚老几代人，种田炀帝宫。
零落池台势，高低禾黍中。

怀仙二首

鲍溶

昆仑九层台，台上宫城峻。西母持地图，东来献虞舜。
虞宫礼成后，回驾仙风顺。十二楼上人，笙歌沸天引。
裴回扶桑路，白日生离恨。青鸟更不来，麻姑断书信。
乃知东海水，清浅谁能问。
阊峰绮阁几千丈，瑶水西流十二城。
曾见周灵王太子，碧桃花下自吹笙。



怀远人

鲍溶

远道在天际，客行如浮云。浮云不知归，似我长望君。
秋至汉水高，南音何时闻。瑶草难远寄，西风气氤氲。
常恐山岳游，不反鸾凤群。无厌坐迟人，风雨惊斯文。

怀尹真人

鲍溶

万里叠嶂翠，一心浮云闲。羽人杏花发，倚树红琼颜。
流水杳冥外，女萝阴荫间。却思人间世，多恐不可还。
青鸟飞难远，春云晴不闲。但恐五灵车，山上复有山。

秋晚铜山道中宿隐者

鲍溶

我乡山川遥，秋晚空景促。天明共云散，日落依鸟宿。
主人逃名子，鹤发卧空谷。野言得真风，山貌宜古服。
喜于无声地，暂傲羲皇俗。秋窗照疏萤，寒犬吠落木。
朝隐留此处，一点天边宿。今忆见此时，添悲览止足。
迟迟清夜昼，幽路出深竹。笑谢万户侯，余将耻干禄。



感怀

鲍溶

宿心不觉远，事去劳追忆。旷古川上怀，东流几时息。
门前青山路，眼见归不得。晓梦云月光，过秋兰蕙色。

经秦皇墓

鲍溶

左岗青虬盘，右坂白虎踞。谁识此中陵，祖龙藏身处。
别为一天地，下入三泉路。珠华翔青鸟，玉影耀白兔。
山河一易姓，万事随人去。白昼盗开陵，玄冬火焚树。
哀哉送死厚，乃为弃身具。死者不复知，回看汉文墓。

将归旧山留别孟郊

鲍溶

择木无利刃，羡鱼无巧纶。如何不量力，自取中路贫。
前者不厌耕，一日不离亲。今来千里外，我心不在身。
悠悠慈母心，惟愿才如人。蚕桑能几许，衣服常著新。
一饭吐尺丝，谁见此殷勤。别君归耕去，持火烧车轮。



留辞杜员外式方

鲍溶

东风吹旅怀，乡梦无夜无。惭见君子堂，贫思上归途。
海岳泛念深，涓尘复何须。婆娑不在本，屈曲无弦唬
惻惻奉离尊，承欢独向隅。时当凤来日，孰用鸡鸣夫。
回首九仙门，皇家在玉壶。惭非海人别，泪下不成珠。

长城

鲍溶

蒙公虏生人，北筑秦氏冤。祸兴萧墙内，万里防祸根。
城成六国亡，宫阙启千门。生人半为土，何用空中原。
奈何家天下，骨肉尚无恩。投沙拥海水，安得久不翻。
乘高惨人魂，寒日易黄昏。枯骨贯朽铁，砂中如有言。
万古骊山下，徒悲野火燔。

蔡平喜遇河阳马判官宽话别

鲍溶

从事东军正四年，相逢且喜偃兵前。看寻狡兔翻三窟，



见射妖星落九天。江上柳营回鼓角，河阳花府望神仙。
秋风萧飒醉中别，白马嘶霜雁叫烟。

寄福州从事殷尧藩

鲍溶

越岭寒轻物象殊，海城台阁似蓬壶。几回入市鲛绡女，
终岁啼花山鹧鸪。雷令剑龙知去未，虎夷云鹤亦来无。
就中静事冥宵话，何惜双轮访病夫。

壮士行

鲍溶

西方太白高，壮士羞病死。心知报恩处，对酒歌易水。
沙鸿噪天末，横剑别妻子。苏武执节归，班超束书起。
山河不足重，重在遇知己。

章华宫行

鲍溶

烟渚南鸿呼晓群，章华宫娥怨行云。十二巫峰仰天绿，
金车何处邀云宿。小腰矮堕三千人，宫衣水碧颜青春。



岂无一人似神女，忍使黛蛾常不伸。黛蛾不伸犹自可，
春朝诸处门常锁。

倚瑟行

鲍溶

金舆传惊灞浐水，龙旗参天行殿危。左文皇帝右慎姬，
北面侍臣张释之。因高知处邯郸道，寿陵已见生秋草。
万世何人不此归，一言出口堪生老。高歌倚瑟流清悲，
徐乐哀生知为谁。臣惊欢叹不可放，愿赐一言释名妄。
明珠为日红亭亭，水银为河玉为星。泉宫一闭秦国丧，
牧童弄火骊山上。与世无情在速贫，弃尸于野由斯葬。
生死茫茫不可知，视不一姓君莫悲。始皇有训二世哲，
君独何人至于斯。灞陵一代无发毁，俭风本是张廷尉。

辞辇行

鲍溶

汉家代久淳风薄，帝重微行极荒乐。青娥三千奉一人，
班女不以色事君。朝停玉辇诏同载，三十六宫皆眇眇。
不惊六马缓天仪，从容鸣环前致辞。君恩如海深难竭，

